

VERLOËNINGSGEBED IN REAKSIE OP DIE LERING “COME OUT OF HER MY PEOPLE”



MEESTERPLAN VAN SATAN OM DIE BRUID VAN JESUS CHRISTUS OP AARDE TE BIND EN TE VERBLIND

Hierdie verloëningsgebed volg op die lering “*Come out of her (Babylon) My people*” wat vryelik op Ignited in Christ se YouTube kanaal beskikbaar is. In hierdie lering is, onder andere, die volgende blootgelê:

- Hoe ons as gelowiges in Jesus Christus dikwels 'n afgod maak van die Bybel;
- Die heidense (Babiloniese) oorsprong van die valse drie-eenheid;
- Die valse leerstelling (doktriene) van die doop in die algemeen maar ook en veral van die doop van gelowiges deur volle onderdompeling in water; asook
- Die valse sakrament van die nagmaal.


Dit vorm egter slegs deel van die meesterplan van Satan om deur misleiding, dogma, valse leerstellinge en sakramente die eindtyd Bruid van Jesus Christus op aarde te bind en te verblind.

Slegs die Heilige Gees is egter in staat om enige gelowige in Jesus Christus van hierdie waarhede te oortuig (Mat. 16:17) en daarom is hierdie verloëningsgebed slegs vir die ware aanbidders (die Bruid van Jesus Christus) wat kies om Hom in gees en in waarheid te aanbid (Joh. 4: 23) en wat begeer om vrygemaak te word van alle heidense dogma, leerstellinge en sakramente.

Moet asseblief nie hierdie gebed bid as jy nog nie die volle oortuiging van die waarheid (soos uiteengesit in ons bogenoemde lering) verkry het nie. Bid ook eers hierdie gebed nadat jy die volledige reeks van video's met betrekking tot hierdie lering op YouTube gekyk het.

1. AGTERGROND: DIE MEESTERPLAN VAN SATAN OM DIE BRUID VAN JESUS CHRISTUS OP AARDE TE BIND EN TE VERBLIND

Die meesterplan van Satan om die Bruid van Jesus Christus op aarde te bind en te verblind het alles te doen met sy uiterste ontwerp van kabbalistiese heksery naamlik die *Tetractys*, wat ook 'n uitbeelding is van die “Boom van Kennis van Goed en Kwaad” (Satan en die gevalle engele, ook bekend as die “Kabbalistiese Boom van die Lewe”). Die *Tetractys* is daarom eintlik ook 'n uitbeelding van al die krag van "die heelal" (Satan en die gevalle engele) en in hierdie verband is dit ook die vervalsing (teenoorgestelde) van die ware “Boom van die Lewe” (die krag van die opgestane Jesus Christus in ons).



Dit sal egter in meer besonderhede verduidelik word in ons opvolgende leringe in die reeks “*Come out of her My people*” waarin dit duidelik sal word dat die kinderdoop deur besprinkeling asook “aanneming” in die “kerk” ook deel van hierdie meesterontwerp van Satan is. Die meeste gelowiges in Jesus Christus (wat reeds die kinderdoop en hul aanneming verloën het) is egter nog nie heeltemal vrygemaak van die geestelike "seël" van die vyand wat hulle verhinder om die volle opstandings- of *dunamiskrag* van Jesus Christus ten volle in hul lewens te ervaar nie.

Hierdie geestelike ontwerp van heksery en meesterplan van Satan om die Bruid van Jesus Christus op aarde te bind en te verblind, word in gelowiges versterk en in plek gehou deurdat hulle, onbewustelik, steeds in dualisme is en dus, onbewustelik, steeds die songod en die maangodin asook die vals jesus oftewel die antichris aanbid en vereer. Dit gebeur, onder andere, as gevolg van die volgende dwaling en misleiding:

- Om 'n afgod van die Bybel te maak (d.w.s. om te aanbid “in Bybel en waarheid” in plaas van “in gees en in waarheid” (Joh. 4:23)). Baie gelowiges (bewustelik of onbewustelik) eer die Bybel bo die Heilige Gees en as jy een van hulle is, is jou Bybel jou afgod en hierdie afgodery sal jou verhinder om die ware Jesus Christus (wie gesê het dat Hy die weg, die waarheid en die lewe is (Joh. 14:6)) ten volle te leer ken en om in Sy opstandingskrag te kan lewe;

- 'n Verkeerde begrip van wie ons God werklik is. Hierdie dwaling is tweeledig naamlik om, eerstens, 'n verkeerde begrip van die heilige drie-eenheid te hê en, tweedens, om te glo dat die naam "YHVH" (waar dit ook al na "Here" verwys, veral in die Ou Testament) oral noodwendig verwys na die Skeppergod, naamlik die Woord, Jesus Christus. Deur 'n verkeerde begrip van wie God werklik is, aanbid jy, onbewustelik, (ook) die vyand bestaande uit die valse drie-eenheid van Babilon naamlik die songod, maangodin en valse jesus (antichris);
- Dat die doop in water deur volle onderdompeling deur Jesus Christus self beveel is. Geen doop in water (insluitend die babadoop sowel as die doop van gelowiges deur volle onderdompeling) is ooit deur Jesus Christus beveel nie en daarom kan geen doop in water 'n heilige sakrament wees nie. Matteus 28:19 is nie getrou aan die oorspronklike geskifte (manuskripte) waaruit die Bybel saamgestel is nie (soos meer volledig verduidelik in ons lering "*Come out of her My people*"). As gevolg van hierdie misleiding, is gelowiges (wat deur die doop van gelowiges deur volle onderdompeling in water is) eerstens toegewy aan (kinderdoop) en daarna ingewy in (doop deur volle onderdompeling in water) die valse drie-eenheid van Babilon, wat in wese Lucifer en die gevalle engele is. Rituele en sakramente (soos die babadoop en die doop van gelowiges deur volle onderdompeling in water) het die krag van kabbalistiese heksery om te bind en te verblind en vorm nie deel van die vryheid van godsdienstige werke in die Nuwe Verbond wat Jesus vir ons gesterf het om te hê nie;
- Die misleiding dat die nagmaal deur Jesus self ingestel is as "*Die Here se Verbondsmaaltyd*" (nooit ons Here se woorde nie) en dat gelowiges in Hom moet voortgaan (tot sy wederkoms) om sy dood te vier deur die brood en die wyn (as simbole van sy liggaam en sy bloed) te neem. Dit stel die vyand in staat om die opgestane Jesus in jou (die opstandingskrag van die Heilige Gees) oor en oor geestelik te kruisig en terselfdertyd sy gees in jou (die Kundalini of vals heilige gees) te voed. Terwyl jy dink dat jy die ware God aanbid, aanbid jy eintlik dan (ook) die een wat Jesus gekruisig het en Sy dood saam met die gevalle engele gevier het. Nagmaal is dus aktiewe aanbidding van die vyand en is wel 'n verbondsmaaltyd maar wel dié van die Donker Heer (YHVH) wat in dualisme (saam met die ware God in die Ou Testament, wie die Jode in Judaïsme tot vandag toe aanhou aanbid) deur die Israëliete vereer is. Deur deel te neem aan hierdie verbondsmaaltyd sit jy dus aan die verbondstafel van die vyand waardeur jou verbond met hom (by jou aanneming en/of by jou doop deur volle onderdompeling in water) voortdurend gevier, herbevestig en bekragtig word.

Dit is geweldig skokkend om hierdie dinge te moet beseef maar dit is ongelukkig waar en dit is beter dat ons nou, terwyl daar nog tyd is, hierdie dinge bely en vir Jesus vra om ons te vergewe as wat ons daarin volhard en dit ewigheidsimplikasies vir ons kan he (Op. 14:13). Die Bruid van Jesus Christus behoort wakker te word uit haar sluimering aangesien haar Bruidegom, Jesus Christus, reeds voor die deur is (Op. 3:20) en ons reeds midde in eindtyd gebeurte staan.

In hierdie verloëningsgebed sal ons al die bogenoemde verloën, maar hou net in gedagte dat daar nog meer is (wat geopenbaar moet word in ons leringe wat nog gaan kom, as deel van die reeks “*Come out of her My people*”) en dat die fondament van hierdie geestelike *tetractys* (wat effektiewelik die Bruid van Jesus Christus gevange hou) eers heeltemal afgebreek en omvergegooi kan word wanneer die waarheid wat nog geopenbaar sal word (wat spesifiek betrekking het op die dualisme in die Ou Testament, die kinderdoop en aanneming in die kerk) ook ontdek is tesame met die leuens wat daarop betrekking het.

Come out of her My people (Op. 18(4)) beteken dus dat die Bruid van Jesus Christus uit haar (onbewustelike) Songod en Maangodin aanbidding moet kom sodat wanneer Babilon (die vals kerk van die antichris op aarde onder leiding van die Rooms Katolieke Kerk) deur Jesus Christus in die eindtyd geoordeel gaan word, sy nie saam met Babilon skuldig bevind sal word nie en dus nie saam met Babilon sal sterf aan al die plaes wat oor haar sal kom nie (Op. 18(4)).

2. VERLOËNINGSGEBED: BELYDENIS EN BEKERING

(Onthou dat jy in die geestelike “gaping” mag staan vir enigiemand (bv. minderjarige kinders en bejaardes) wat onder jou geestelike gesag is of was (bv. ten tye van hul doop).)

2.1 Afgodery: Die Bybel as afgod

My Here Jesus Christus, ek bely dat ek, bewustelik of onbewustelik, by geleentheid 'n afgod van die Bybel gemaak het deur die geskrewe Woord bo die Lewende Woord (wat U is Jesus Christus) te plaas. Ek erken wat U vir U dissipels gesê het in Johannes 16:13 (net voor U hemelvaart) dat wanneer U weg is, U vir hulle die Heilige Gees sal stuur en dat die Heilige Gees hulle in alle waarheid sal lei.

Ek bely daarom dat ek, bewustelik of onbewustelik, 'n afgod gemaak het van die geskrewe Woord, die Bybel, en vra U om my te vergewe Jesus en om my skoon te was met U kosbare bloed.

Help my asseblief om daaglik die geskrewe Woord te lees met onderskeiding deur dit voor u Heilige Gees te bring sodat U deur U Gees vir my dit kan interpreteer en ook vir my kan bevestig of wat daar staan U Waarheid is.

2.2 Misleiding: Vals dogma van die (Babiloniese) drie-eenheid

Here Jesus Christus, ek bely dat ek deur verskeie godsdienstige praktyke en dogma (wetend of onwetend) die valse Babiloniese drie-eenheid aanbid het wat bestaan uit die songod, die maangodin en die valse jesus of antichris (in beginsel, Lucifer en die gevalle engele).

Ek bely en erken dat die Rooms-Katolieke Kerk (wat vir meer as 'n duisend jaar die enigste "bewaarder" van die Skrif (Bybel) in Latyn was) in so 'n mate met die geskrewe Woord ingemeng het, dat hierdie vals drie-eenheid op strategiese plekke geïnkorporeer is in die Nuwe Testament (bv. Mat. 28:19). Die doel daarvan was om gelowiges te mislei om te dink dat U uit drie afsonderlike gode bestaan, naamlik god die Vader (songod) en god die Seun (valse jesus of antichris) en god die Heilige Gees (maangodin of Moeder Maria in die Rooms-Katolieke Kerk).



Hierdie dogma oor die vals drie-eenheid is in stryd met die Lewende Woord, naamlik aan wie Uself gesê het dat U is. U het gesê dat U net een God is en dat die Vader in U is en dat U in die Vader is en dat die Heilige Gees die Gees van beide die Vader en die Seun is, maar dat almal saam net Een God is (Joh. 10:38; Joh. 14:10 & 11 ens.).

U het gekies om Uself (wat Gees is) in drie (3) hoedanighede of persoonlikhede (naamlik die Vader, Seun en Heilige Gees) aan die mensdom bekend te maak maar dit beteken nie dat U as drie (3) afsonderlike persone aanbid moet word (soos in die Rooms Katolieke Kerk) nie. (Hierdie aspek word egter meer volledig in die lering verduidelik.)

Ek het dus berou oor die feit dat ek (onwetend en godsdienstig vanweë hierdie Rooms Katolieke dogma) die valse drie-eenheid van Babilon (op verskeie maniere en geleenthede) aanbid het. Vergewe my asseblief vir hierdie dwaling oor wie U werklik is Here Jesus Christus en was my skoon met U kosbare bloed.

2.3 Valse leerstelling: Doop van gelowiges (in die naam van die onheilige drie-eenheid) deur volle onderdompeling in water

Here Jesus Christus, ek het die lering genaamd “*Come out of her My people*” bestudeer en is deur die Heilige Gees oortuig dat dit die waarheid is. Ek weet nou dat die doop van gelowiges deur volle onderdompeling in water nooit 'n opdrag van U, Jesus Christus, was nie, maar dat dit sy oorsprong in Babilon en spesifiek in Kabbalistiese heksery het. Ek bely dus met volle oortuiging die volgende:

- Matteus 28:19 is nie getrou aan U oorspronklike woorde aan U dissipels nie Jesus, aangesien U nooit na hierdie “formule van drie-eenheid” van die Rooms-Katolieke Kerk verwys het toe U hierdie aarde bewandel het nie. Wat meer is (volgens die vroegste geskryfte van die Kerkvader Eusebius) het U nooit eers die doop genoem in U opdrag aan U dissipels nie maar bloot gesê dat hulle “*vergifnis van sonde moet verkondig aan al die nasies*”;
- Daar is dus geen onbetwiste Skrif in die Bybel wat voldoende bewys is van die feit dat Jesus self die doop met water (na Sy opstanding) beveel het nie en daarom kan dit nie 'n heilige sakrament wees nie. Dit is intendeel 'n valse leerstelling wat deur die Rooms-Katolieke Kerk ingevoer is (wat van die heidendom afgelei is) en wat sy eintlike oorsprong in Kabbalistiese heksery het;
- Doop in water het sy oorsprong in Babilon (soos [Alexander Hislop](#) in sy boek *The Two Babylons* meer volledig uiteensit en verduidelik) . Lucifer en die gevalle engele (en hul Nephilim en Hybrid nageslag (die reuse)) was diegene wat in die vloed van Noag deur water gered is en as gevolg van die water oorleef het (bv. die hybrid, Dagon die visgod). Dit was hulle (die Nephilim) wat op hierdie manier deur water “wedergebore” is tot 'n heel nuwe lewe (na die sondvloed). Die Babiloniese priesters het die volk opsetlik mislei met die leuen dat die regverdige Noag oorleef het as gevolg van die water en op hierdie manier “wedergebore” is in die lewe na die sondvloed. Dit is egter duidelik vir die onderskeidende gelowige in Jesus Christus dat Noag en sy gesin nie deur die sondvloed (water) gered is nie, maar dat hulle deur hulle geloof (in God deur middel van die bou van die Ark) van die sondvloed (water) gered is. Dit is hierdie slinkse leuen met sy oorsprong in die Babiloniese geheimenisse van “die gode” (die gevalle engele) wat ook deel geword het van die Kabbalistiese Joodse kultuur en godsdiens (onder andere tydens die Babiloniese ballingskap). Dit verklaar dan ook hoe die apostel Petrus so mislei kon gewees het om die leuen te glo dat “*die doop red*”, net soos Noag tydens die sondvloed “deur die water gered is” (1 Pet. 3: 20 & 21). Die ander Nuwe-Testamentiese gelowiges (wat oënskynlik voortgegaan het om die doop deur volle onderdompeling in water te beoefen) het in wese

voortgegaan om die Joodse Kabbalistiese Mikveh te beoefen waaraan hulle as Jode ook reeds kultureel en godsdienstig goed bekend was;

- Doop deur volle onderdompeling in water is presies wat die Kabbalistiese Jode tot vandag toe beoefen wanneer hulle deur die Mikveh gaan en een word met “god” (wat nie ons God is nie, maar die vyand). Ons God, Jesus Christus, is nie soos die gode van die heidense nasies nie, maar staan direk teenoor hulle soos Lig staan teenoor duisternis (Jer. 10:2);
- Die doop van gelowiges (deur volle onderdompeling in water) is dus 'n Kabbalistiese water inisiasieritueel in Lucifer en die gevalle engele (die valse drie-eenheid) wat bedoel is om die Bruid van Jesus Christus deur Kabbalistiese hekserij te bind en te verblind. Dit voorsien vir haar 'n valse of vervalste geestelike reis van uiteindelik Kundalini-ontwaking (vals heilige gees en valse “verligting”), waardeur sy mislei word om te glo dat sy die ware God volg (U Jesus Christus) terwyl sy in werklikheid die Kundalini (gees van die antichris) voortdurend in haarself bemagtig en versterk;
- Die doop van gelowiges deur volle onderdompeling in water simboliseer die terugkeer van die gelowige in die baarmoeder van die moedergodin (maangodin) om daardeur (deur werke wat in wese songod-aanbidding is) geestelik “weer gebore” te word in Lucifer/Satan/Antichris ;
- Die doop van gelowiges (in die naam van die onheilige drie-eenheid) deur volle onderdompeling in water is dus 'n inwyding- of inisiasieritueel in die valse drie-eenheid in. In die watergraf (of baarmoeder) word die gelowige een met die vyand (Lucifer en die gevalle engele) in 'n huweliksverbond. Dit het tot gevolg dat die gelowige in Jesus Christus hom- of haarself dan weer in dualisme bevind net soos die Israeliete in dualisme was. Dit beteken om terselfdertyd in twee verbonde met 2 geestelike eggenote te wees, dit wil sê met U, Jesus Christus, en ook met die vyand.
- Petrus en die apostels (wat hom gevolg het in sy opdrag dat hulle na hulle Heilige Gees doop ook in water gedoop moes word) is oënskynlik ook deur die vyand teruggeneem in dualisme en dit verklaar waarskynlik vir ons hoekom hulle, sonder uitsondering, elkeen wreed vermoor is deur die vyand en moes ly (Jakobus is met die swaard deurboor, Paulus is onthoof en selfs Petrus is onderstebo gekruisig). Dit terwyl U in Psalm 91 gesê het dat U dié wat in U glo teen alle gevare sal beskerm; en
- Dit is om hierdie rede dat die doop van gelowiges deur volle onderdompeling in water deur die Vrymesselaarleraars van byna al die groot charismatiese kerke wêreldwyd ondersteun en aktief bevorder word. Dit is ook hoekom ons charismatiese kerke (in die algemeen) so deur die valsheid van die Kundalini besmet is. Dit is duidelik uit al die vals profesieë, vals tekens en wonders, vals tale en vals genesings asook valse “prosperity gospel”.

Ek bely verder die volgende leuens ten opsigte van die doop van gelowiges deur volle onderdompeling in water:

- Dat dit die krag het om my van sonde te reinig of dan vir my “n goeie gewete voor God te bewerkstellig” (sien Petrus se misleiding - 1 Pet. 3:21). Slegs die bloed van Jesus Christus wat vir my aan die kruis gestort is, het die krag om my van alle sonde te reinig en om my tot volkome geregtigheid te herstel. Dit het gebeur toe ek my lewe in geloof aan Jesus Christus gegee het en Sy verlossing uit genade aangeneem het;
- Dat dit sal veroorsaak dat ek geestelik, sielkundig en/of fisies wedergebore word in Jesus Christus. Slegs die doping met die Heilige Gees (gegee deur Jesus Christus self) het die krag om my geestelik wedergebore te laat word in Jesus Christus. Dit is, soos Paulus verduidelik, die besnydenis sonder hande (Kol. 2:11). Inteendeel, die doop van gelowiges deur volle onderdompeling in water het veroorsaak dat die Kundalini in my kon ontwaak en dit het my in verbond met die vyand gebring;
- Dat dit my in staat stel om deel te word van die Liggaam van Jesus Christus op aarde. Ek het deel geword van Jesus Christus se geestelike Liggaam op aarde deur geloof en my geestelike wedergeboorte in Hom het gekom deur die krag van die Heilige Gees (1 Kor. 12:13). Die doop van gelowiges in water, inteendeel, het veroorsaak dat ek deel geword het van die kerk van die antichris op aarde (in wese verteenwoordig deur die Rooms-Katolieke Kerk) wat ernstige implikasies vir my sal inhou, veral teen die einde van die tyd wanneer hierdie vals bruid saam met Babilon (die vals kerk van die antichris) geoordeel sal word (Op. 18(4)); en
- Dat ek krag en beskerming sal ontvang vir bediening en dissipelskap. Die bloed van Jesus Christus is kragtig genoeg om my te beskerm (en hoef nie deur water versterk te word nie) en die Heilige Gees bemagtig my vir bediening en rus my toe met al die geestelike gawes (1 Kor. 12). Die doop van gelowiges deur volle onderdompeling in water het my inteendeel oopgemaak vir ernstige geestelike vervolging, hekserij, gedagtebeheer en programmering met die eindresultaat om heeltemal geestelik ingehok te word deur die vyand (Kundalini, die vals heilige gees)).

Ek bely laastens in hierdie verband dat die ware doop van Jesus Christus Sy doping met die Heilige Gees (Mat. 3:11 en Hand. 1:5) en met Sy Vuur (Sy *dunamis* krag) is. Jesus bedien dit “van bo” en nie as gevolg van handoplegging nie. Die ware doop van die Nuwe Verbond is dus die Doping deur Jesus Christus self met die Vuur van die Heilige Gees wat ook veroorsaak dat gelowiges geestelik wedergebore word. Dit is dan (deur die doping van die Heilige Gees) dat die

gelowige die 9 gawes van die Heilige Gees ontvang en bemaagtig word vir bediening (1 Kor. 12).

Jesus, vergewe my asseblief dat ek hierdie leuens geglo het en toegelaat het dat ek mislei word oor die doop van gelowiges deur volle onderdompeling in water en was my skoon (in gees, siel en liggaam) met u kosbare bloed Jesus Christus.

2.4 Valse leerstelling: Doop van gelowiges (slegs in die naam van Jesus) deur volle onderdompeling in water(slegs indien van toepassing)

Here Jesus Christus, ek bely dat ek (in my soeke na die waarheid) my verder laat mislei het (ook as gevolg van die Kundalini en die Kabbalistiese ontwerp van hekserij) om te glo dat ek in U naam alleen gedoop moet word. Hierdie misleiding was ook as gevolg van die waarheid wat ek ontdek het oor die onegtheid van Matteus 28:19 en die feit dat die Rooms-Katolieke Kerk dit verander het en die valse drie-eenheid ingebring het. Op daardie stadium het ek net 'n deel van die waarheid besef en dit is die waarheid oor die valse drie-eenheid (in Matteus 28:19) maar nou besef ek en het tot die volle openbaring gekom dat U nooit 'n waterdoop beveel het nie. Die Rooms Katolieke Kerk het hierdie valse leerstelling van waterdoop in die Bybel ingebring om die Christene te mislei om te dink dat die heidense rituele van waterdoop deur U Jesus beveel is.

Ek besef ook nou dat dit 'n noukeurig ontwerpte plan (of ontwerp) van die vyand was om die opregte volgelinge van U Jesus (die Bruid) te mislei en hul nog meer verstrengel te laat raak in hierdie ontwerp van hekserij. Die uiteindelijke doel daarvan was om hulle reguit in Lucifer ingewy te kry (terwyl hulle sou dink dat hulle gehoorsaam is aan U, Jesus Christus!).

Ek erken dus nou, bely en verklaar dat geen waterdoop deur U Jesus Christus beveel is nie en dat die onaangename werklikheid van wat geestelik gebeur het (toe ek net in die Naam van Jesus gedoop is) was dat ek ingewy is direk in die valse Jesus, d.w.s. Lucifer of die Antichris. Dit was as't ware of die "capstone" van die geestelike piramide van gebondenheid (die *tetractys*) hiermee opgesit was. U het egter, in U genade en liefde, my steeds vasgehou.

Ek erken en bely hierdie misleiding en dwaling opreg voor U, Jesus Christus, en vra U om my te vergewe en skoon te was met u kosbare bloed op gees-, siel- en liggaamsvlak.

2.5 Valse leerstelling: Onheilige Nagmaal

Here Jesus Christus, by die bestudering van die lering "*Come out of her My people*", het ek besef dat die "sakrament" van Nagmaal waaraan ons altyd as gelowiges deelgeneem het (veral toe ons nog lede was van die tradisionele

kerke), nie van U af is nie en dat dit sy oorsprong in die Rooms Katolieke Kerk en in wese in Babilon het.

In hierdie verband bely ek die volgende:

- U het nie die Nagmaal ingestel nie Here Jesus Christus maar U het bloot vir U dissipels gesê (op die vooraand van u arrestasie en kruisiging tydens die pasga maaltyd) dat hulle moet besef en altyd moet onthou (selfs wanneer U nie meer daar is nie) dat U die Paaslam is wat geslag gaan word en dat die Pasga in U vervul sal word. U het nooit 'n opdrag gegee dat brood en wyn van daardie tyd af voortdurend geneem moet word om u kruisdood te herdenk en te onthou nie. Weereens, die opdrag van U dat Nagmaal gehou moet word en wat dit dan 'n heilige sakrament sou maak, is eenvoudig nie daar nie. Dit is dus 'n leuen wat ook sy geestelike wortels in die heidendom het en verder deur die Rooms-Katolieke Kerk by wyse van "Mis" (*Mass*) gepropageer en gevier is. As die kerk wat die antichris op aarde verteenwoordig, het hulle dit (by wyse van wysigings aan en toevoegings tot die geskrewe Woord) voorgedoen as 'n "heilige" sakrament en Protestantisme het dit godsdienstiglik van hulle oorgeërf. Hierdie valse leerstelling het ongelukkig die protestantse hervorming van Martin Luther en ander "oorleef" (net soos die valse leerstelling van die kinderdoop "oorleef" het totdat die valsheid daarvan ook redelik onlangs deur die Heilige Gees aan U Bruid geopenbaar is);
- Ek verstaan verder dat U, Jesus Christus, nie aan die Vader geoffer is nie (as 'n aparte en afsonderlike persoon/god van Uself wat deel vorm van die onheilige drie-eenheid). Ek verstaan dat U aan Satan (Lucifer en die gevalle engele) geoffer is, in ons plek. Hy is die een wat behae het in bloedoffers en nie U nie. Ons het verdien om te sterf (soos Barnabas) as gevolg van ons sonde maar U het ons sonde en skuld op Uself geneem en in ons plek gesterf. U sê dan ook in U geskrewe Woord dat U geen begeerte het vir offers en bloedoffers nie (Hosea 6:6; Hosea 9:4; Heb. 10:5-6). Aan die ander kant is Satan die god van sonde en dood en dit is aan hom te danke dat sonde en dood in die wêreld gekom het. Hy begeer en het behae in bloedoffers. U het dus gewilliglik U eie aardse lewe prysgegee om aan Satan geoffer te word (om vir ons sonde te betaal en ons daardeur van die sonde en die ewige dood te verlos). (Dit is belangrik om hierdie reg te verstaan want dit verduidelik vir ons hoe dit kan wees dat toe ons die brood geëet en die wyn gedrink het, ons geestelik voedsel en drank geëet het wat aan afgode geoffer is (Op. 2:20));
- Ek bely dat nóg enige waterdoop nóg die Nagmaal 'n waarborg van my redding is. Net my geloof in Jesus Christus en in wat Hy aan die kruis vir my gedoen het, kan my red. Geen ritueel of selfs sakrament het enige deel in my verlossing nie;

- Ek bely dat ek, onwetend, deur Nagmaal die feit gevier het dat ek deel is van die geestelike liggaam van die antichris (Satan) op aarde (d.w.s. verteenwoordig deur die Rooms-Katolieke Kerk) deur die feit dat ek geassosieer het met die (geestelike) verorbering van die dooie liggaam en bloed van Jesus Christus saam met Satan en die gevalle engele;
- In die Nagmaal het ek, onwetend, nie net die dood van Jesus aan die kruis gevier en verkondig nie, maar ook die toekomstige koms en opkoms van die antichris aangesien dit aan sy verbondstafel was wat ek gesit en vier het;
- Deur die Nagmaal te neem, het ek myself (onwetend) met die bruid van die antichris geassosieer en het aan sy huwelikstafel gesit en verlang na sy koms (as antichris);
- In die Nagmaal het ek, onwetend, die oortollige Ou Verbond gevier en het, onwetend en onopsetlik, verklaar dat die bloed van Jesus voortdurend aangewend moet word (op dieselfde manier as dié van die offerdiere onder die Ou Verbond) om my sondes weg te was en om my tot geregtigheid te herstel. Dit is 'n leuen aangesien ek weet dat Jesus vir eens en vir altyd vir my sondes aan die kruis betaal het en dat ek deur geloof alles geërf het wat Jesus vir my gesterf het om te hê. Ek is reeds regverdig verklaar en die werk van Jesus aan die kruis is voltooi en hoef nie voortdurend en godsdienstiglik vernuwe of verfris te word by wyse van rituele en/of sakramente nie (Joh. 19:30);
- Die gebruik om elke keer te bekeer van my sondes voor ek Nagmaal neem is soortgelyk as toe die Israeliete onder die Ou Verbond gereeld na die priester moes gaan om hulle oor hul sondes te bekeer en dan moes die offerdier met sy bloed vir die sondes betaal sodat dit vergewe kan word. Dit is Ou Verbond. My totale sondige natuur is deur Jesus op Hom geneem aan die kruis en Hy het eens en vir altyd die volle prys betaal vir my om tot geregtigheid in Hom herstel te word. Ek is dus die geregtigheid van God in U, Jesus Christus (2 Kor. 5:21), en niks kan my nou skei van u genade en liefde nie (Rom. 8:39);
- Die Nuwe Verbond bestaan nie uit enige rituele of sakramente nie aangesien U ons kom bevry het van dooie godsdienstige werke en dit vir ons moontlik gemaak het om U intiem te ken en heeltyd hegte geestelike gemeenskap met U te hê;
- U werk aan die kruis is voltooid en niks hoef daarby gevoeg te word nie en daarom hoef ons nie dit wat U vir ons aan die kruis gedoen het deurlopend en ritualisties toe te pas nie. Ons lewe deur geloof en geloof alleen. U het aan die kruis uitgeroep dat *“Dit is volbring”* (Joh. 19:30) en daarom hoef ons niks te doen om by te voeg by wat U reeds vir ons gedoen het nie;
- Die oorsprong van Nagmaal is heidens aangesien dit 'n bekende feit is dat die heidene hul gode aanbid het deur gewyde kos en drank te eet nadat dit

aan hul afgode geoffer is. Op hierdie manier is geglo dat die mag van die besondere god (songod en/of maangodin) selfs hulle liggame sal binnedring en hulle sal versterk en regverdig;

- Die wyn of druiwesap simboliseer die songod (asook sy seun (die valse jesus of antichris, dink bv. ook aan Bacchus) en die brood simboliseer die vrugbaarheidsgodin of maangodin. Deur hulle vereniging (in die gebruik daarvan in die Nagmaal) word geestelike krag van die antieke geheimenisse van "die gode" (die gevalle engele) deur die vereniging van die songod en die maangodin (die manlike en vroulike geestelike kragte) geskenk en uiteindelik aan die antichris of valse jesus. Op hierdie manier veroorsaak die vyand dat sy gees, naamlik die Kundalini, krag en momentum in ons as gelowiges in Jesus Christus kry;
- In die Nagmaal het ons, onwetend, die dood van Jesus gevier en verkondig en Hom oor en oor weer vir onself geestelik gekruisig. Ons het nie net dit gedoen nie, maar ons het ook onwetend onself en ons lewens op die altaar van Satan opgeoffer. Ek bely dus dat die neem van Nagmaal is om Satan aktief te aanbid;
- Ek bely dat deur die geofferde liggaam en bloed van Jesus geestelik te eet, ek, onwetend, kos en drank geëet het wat aan afgode (Satan) toegewy en geoffer is en daardeur nie net my gees nie, maar ook my siel en liggaam verontreinig het;
- Deur die Nagmaal te neem, het ek my vereenselwig met die lyding van Jesus aan die kruis en het ek, onwetend, weer die volle gewig van die vloek van sonde en dood op my geneem. Sodoende het ek (onwetend) geestelike melaatsheid oor myself gebring in gees, siel en liggaam. Ek het my dus oopgestel vir "die plaë van Babilon" waarteen U ons waarsku (in Openbaring 18:4) wat sal kom oor diegene wat hulle nie van hierdie sondes bekeer nie;
- Ek erken dat ek (onwetend en onopsetlik) aan die verbondstafel van Satan gesit het en saam met hom die dood van Jesus Christus gevier het en daardeur het ek, onwetend, voortdurend die verbond met Satan wat ek, onwetend, deur die doop van gelowiges asook deur my aanneming in die kerk gesluit het, hernu en bevestig; en
- Ek bely, in die algemeen, dat die Koninkryk van Jesus Christus (bestaande uit die Nuwe Verbond wat moontlik gemaak is deur die bloed van Jesus Christus aan die kruis) nie uit enige rituele en/of sakramente bestaan nie. Dit alles is dooie godsdienstige werke en behoort tot die Ou Verbond of die Koninkryk van Satan. U het ons heeltemal vrygemaak van godsdienstige werke.

Jesus, ek bely dit alles opreg en vra U om vergifnis vir hierdie sonde van die geestelike eet en drink van voedsel en drank wat aan afgode toegewy en geoffer

is (Op. 2:20). Was my asseblief skoon op gees-, siel- en liggaamsvlak met u kosbare bloed.

Jesus Christus, vergewe my asseblief vir hierdie verskriklike sonde en was met U bloed alle ongeregtigheid en onreinheid weg. Herstel my asseblief tot volkome gesondheid en welstand op gees-, siel- en liggaamsvlak.

2.6 Verloëning van die krag van U bloed en die Heilige Gees

Here Jesus Christus, ek het tot die volle begrip gekom van wat ek gedoen het toe ek myself toegelaat het om deur volle onderdompeling in water gedoop te word en toe ek Nagmaal geneem het.

Ek, soos Judas, het U onwetend Jesus Christus verrai en spesifiek die prys wat U vir my aan die kruis betaal het en, soos Petrus, het ek ook onwetend die krag van U bloed en van die Heilige Gees verloën en valslik geglo dat die water (soos ook die Nagmaal) my tot geregtigheid sou bevorder en my sou bemagtig vir dissipelskap.

Hierdeur het ek dus, onwetend, verhinder dat U bloed my volledig kan beskerm asook dat U Heilige Gees my in krag en outoriteit kon oprig.

Dit is baie ernstig Here Jesus Christus, maar ek vra U om my sonde te vergewe en my skoon te was met u kosbare bloed en om my toe te laat om opnuut te wandel in die volle krag van die Heilige Gees en om onder die beskerming van U bloed te staan.

2.7 Die bediening van sakramente en rituele aan ander

Jesus Christus, ek bely opreg (en vra U om vergifnis vir) die volgende:

- Dat ek, onwetend, 'n ander evangelie verkondig het (dié van regverdigmaking deur die doop van gelowiges deur volle onderdompeling in water sowel as dié van die Nagmaal) en onwetend eer aan 'n ander jesus (Lucifer en die gevalle engele) gegee het en, onwetend, 'n ander gees in my en andere bemagtig het (dié van die Kundalini of die gees van die antichris) (2 Kor. 11:4);
- Dat ek myself deur volle onderdompeling in water laat doop het en daarna ook andere gedoop het (indien van toepassing en noem dié name van die persone wat jy kan onthou);
- Dat ek Nagmaal geneem het en dit ook aan ander bedien het, en daardeur voortdurend U dood Jesus Christus gevier het in plaas daarvan om myself daagliks daarin te verheug dat U die sonde en die dood vir ons oorwin het en dat U lewe en dat alle mag in die hemel en op die aarde aan U gegee is, Jesus Christus; en

- Dat ek, onwetend en onopsetlik, in die hoedanigheid van priester of priesteres van duisternis aan die koninkryk van die duisternis deelgeneem het toe ek medegelowiges gedoop en/of aan hulle Nagmaal bedien het.

Vergewe my asseblief Jesus Christus en was my skoon met u kosbare bloed. Kanselleer asseblief enige deelname aan hierdie valse priesterskap van die vyand oor my.

Ek vergewe ook daardie medegelowiges wat my gedoop het en wat in die verlede aan my Nagmaal bedien het en erken dat hulle ook in dwaling was en nie geweet het wat hulle doen nie. Ek spreek hulle geheel en al vry.

Ek vergewe ook myself dat ek, in die eerste plek, in hierdie twee valse leerstellings mislei is en, tweedens en die belangrikste, dat ek ander mense gedoop het en ook aan hulle Nagmaal bedien het. Ek bely dat ek hulle daardeur onbewustelik mislei het tot 'n valse evangelie, 'n valse jesus en 'n valse gees (die van die antichris of Kundalini).

Laastens vergewe ek myself ook dat ek onwetend in 'n valse priesterskap ingestap het elke keer as ek óf Nagmaal óf die doop van gelowiges deur volle onderdompeling in water aan my medegelowiges bedien het. Ek vergewe myself heeltemal en spreek myself heeltemal vry.

3. VERSOEK OM NIETIGVERKLARING VAN DIE VERBONDE EN OOREENKOMSTE MET DIE VYAND

Ek erken dat die doop van gelowiges deur volle onderdompeling in water gelei het tot 'n huweliksverbond (eenwording) tussen myself en Lucifer/Satan sowel as met die gevalle engele en dat hierdie verbond bedoel was om vir ewig te wees en om nooit verbreek te word nie. (Dit is wat U bedoel het met die pleeg van seksuele immoraliteit met afgode in Openbaring 2 vers 20.)

Ek erken ook dat ek, elke keer wat ek Nagmaal geneem het, onwetend hierdie verbond met die vyand gevier en versterk het.

Hierdie twee valse leerstellings is beide rituele wat sterk Kabbalistiese heksery bevat en het gelei tot ernstige gedagtebeheer, programmering (DID splitsing) met die doel om my geestelik te bind.

Ek nader dus U heilige Troon van Geregtigheid in die geestesrealm nou Here Jesus Christus en spesifiek in U hoedanigheid as die Hoogste Regter in die Hemelse geregshowe. Ek stel my saak voor U Here Jesus Christus en verklaar die volgende:

- Dat ek deur die vyand mislei is en nie beseft het dat ek 'n verbond met hom aangegaan en telkens gevier het nie. Ek was onder die verkeerde indruk

dat ek U opdragte gehoorsaam het om in water gedoop te word en Nagmaal te neem, maar in plaas daarvan het ek met Satan saamgestem en is mislei om 'n verbond met hom te sluit en saam met hom fees te vier oor U kruisiging. Ek was dus in dwaling en daarom vra ek dat U 'n bevel uitreik dat die verbond(e) tussen myself en die vyand nietig is en dus van geen krag en effek hoegenaamd is nie;

- Ek vra U ook om die vyand te beveel om alles wat geestelik, verstandelik, sielkundig en fisies van my gesteel is, aan my terug te gee;
- Ek vra U ook om my naam deur die krag van U bloed uit enige Boeke van die Dood van Satan te verwyder;
- Verwyder asseblief ook met die krag van U bloed enige geestelike seël of merk van die antichris wat deur die Doop van Gelowiges deur volle onderdompeling in water op my geesmens aangebring is;
- Verklaar asseblief ook enige ooreenkomste tussen myself en Satan op geestelike gebied nietig op grond van my dwaling en beveel dit in hierdie verband om in die geestesrealm in vlamme op te gaan; en
- Kanselleer asseblief ook enige geestelike lidmaatskap (van myself) van die Kerk van die Antichris op aarde (d.w.s. ook van die Rooms Katolieke Kerk).

4. **VERSOEK VIR RESTITUSIE, HERSTEL EN GENESING**

Here Jesus Christus, ek vra dat U die vyand sal beveel om alle geestelike gevangenes van my menslike gees en siel in die vorm van DID dele aan my terug te gee. Ek vra ook dat alle demoniese kopieë wat van my menslike siel en selfs menslike gees gemaak is (as gevolg van die Kabbalistiese heksery wat in hierdie rituele vervat is) gekanselleer sal word.

Here Jesus Christus, was my asseblief (en spesifiek die DID dele van my menslike gees en siel) skoon met u kosbare bloed van alle heksery, dood en vernietiging op gees, siel en liggaamsvlak. Integreer en herstel ook enige DID dele van my menslike gees en siel wat (deur middel van die Kabbalistiese heksery van die rituele) deur die vyand van my gesteel is.

Kanselleer asseblief Here Jesus Christus alle gedagtebeheer en programmering van bv. dood, vernietiging, lyding, siekte, geestelike melaatsheid, isolasie, verwerping en al die ander beheer en programmering wat nie eers genoem is nie.

Kanselleer asseblief die bemagtiging van die Kundalini asook die onderdrukking van die werking van U Heilige Gees wat in my in werking getree het as gevolg van hierdie rituele van die vyand. Was al die energie-sentra (chakras) in my liggaam, siel en gees skoon met U kosbare bloed. Indien my derde oog oopgegaan het as

gevolg van hierdie rituele, vra ek dat dit ook nou heeltemal sal toemaak en dat U dit sal verseël met U bloed Jesus Christus.

Maak asseblief my geestelike sintuie oop, insluitend my geestelike oë en ore vir U Koninkryk en vir U Heilige Gees Jesus Christus en verwyder enige geestelike sluiers of hindernisse wat deur die vyand opgesit is om my geestelik op gees-, siel- en liggaamsvlak te blokkeer.

Ek vra laastens ook vir volkome genesing en herstel in my fisiese liggaam en dat U met U eie hande Jesus Christus die Kundalini van menslike geesvlak af ondertoe sal bind.

Ek vra ook dat U my deur die krag van die Heilige Gees Jesus Christus sal verlos van enige onrein en demoniese geeste wat moontlik deur hierdie rituele gevoed is (en daaruit krag geput het) op menslike gees-, siel- en liggaamsvlak.

5. DANKSEGGING, EER EN GLORIE

Baie dankie, Jesus Christus, vir hierdie eindtyd-openbaring vir U Bruid en dat U my vergewe en my skoon gewas het met U kosbare bloed.

Ek gee aan U al die lof en eer vir hierdie openbaring en vir hierdie gebed!

Dankie Jesus dat ek nou waarlik in U verborge en weggesteek mag wees (Kol. 3:3) en ek vra dat U my in alle waarheid verder sal lei en vrymaak deur die krag van u Heilige Gees.

(Indien U deur hierdie openbaringe en gebed geseën is vra ons dat U dit biddend sal oorweeg om ons bediening met 'n maandelikse finansiële bydrae te seën.

Ons bankbesonderhede is op ons webblad www.ignitedinchrist.org onder "About us".

By voorbaat baie dankie en mag ons Here Jesus Christus U ook ryklik sien.)